



Ella cuschina veglia ha Alessio Schmed tetovau live, e siu frar Pablo ha mischedau musica.



Ina dallas skizzas originalas.

FOTOS AUGUSTIN BEELI

Vibraziuns ella Cuort Ligia Grischa

Dapresent ei la retrospectiva digl artist permier Gieri Schmed el museum Cuort Ligia Grischa a Trun. Dumengia han treis da ses biadis, Laura, Alessio e Pablo Schmed, rendiu honur al tat cun lur atgnas fuormas d'expressiun artistica. Ella venerabla casa dils avats han els presentau musica, art da tetovar e musica psichedelica.

AUGUSTIN BEELI/FMR

«Aschia in suentermiezdi havein nus aunc mai giu en cheu», ha Justina Simeon manegiau. Dapi ch'ella presidescha la Fundaziun Cuort Ligia Grischa e meina il museum, ha Justina Simeon annunziu diversas occurrenz e vernissaschas. Las exposiziuns d'art entscheivan pilpli cun musica e cant, savens eis ei balladas, classica ni auter accumpignament musical. Dumengia suentermiezdi ha ina gruppa da rock dau in concert ella sala da dertgira. Quei che «petta pagada» ha presentau ei rock romontsch, empau sco ils «novs» Hades ni Galiots. Laura Schmed ei commembra dalla gruppa «petta pagada» e biadia da Gieri Schmed (1943–2019).

Animar ils contemporans

Bia glied ei vegnida ella Cuort Ligia Grischa per tedlar e separticipar all'occurrenza esclusiva. Ella sala cun preits e plantschiu decorau cun uoppens da num e da pum ha Laura Schmed cantau e sunau

la ghitarra. Buca persula, mobein cun ses cumpogns dalla band, *Dario Camenisch* (ghitarra), *Mauro Arpagaus* (battaria), *Severin Bonolini* (bass) e *Julia Hansen* (gegia). Laura Schmed ha in'otra expressiun artistica ch'el tat. Ina nuota meins impressiunonta. Ils commembers dalla band han fatg vibrar ils uoppens ella sala da dertgira. Laura e Dario cumpontan las canzuns. La band conta cunzun en romontsch, singuls covers era per engles. G'l'auditori ha udiu tocs sco «prioritads», «DIN666», «M&M cul surcarstgaun», «vargau» e «buc miu problem». Las canzuns vulan animar ils contemporans da reflectar dils problems.

Miez avrel ha «petta pagada» sunau a Glion sco pre-band da No Future. Ella ha entschiet ina via artistic-musicala empermettonta. Sia premiera sco band ha «petta pagada» dau il settember 2021 el hotel Ucliva. Ella Cuort Ligia Grischa ha Laura Schmed rendiu honur al tat Gieri. Leu ei s'aviarta ils 8 d'avrel ina retrospectiva. Visitadras e visitaders san admirar pli che 100 ovras dil pictur-artist. Gieri

Schmed fuorma, ensem cun Alois Carigiet e Matias Spescha, il triumvirat che ha derasau il renum da Trun sco liug digl art. El decuors da sia lavur artistica eis el sereducius sigl essenzial. Las ovras ch'ins sa admirar ellas differentas stanzas e zulers han negins tetels, ins vegn animaus da contemplar e sa suandar il svilup dil figurativ tier gl'abstract.

Abstract e figuras

«Cumpareglei inagada las modas d'exprimer art, quella dad Alessio e quella da siu tat», ha Justina Simeon animau all'entschatta. Ella cuschina veglia dalla Cuort Ligia Grischa han ins giu caschun d'entupar *Alessio Schmed*, in artist dil stil psichedelic. Siu stil san ins cumparegliar cun quel dil renomau H. R. Giger (1940–2014). Alessio tetovescha ses sujets, el posseda in talent unic. Quei che siu tat fageva abstract, fa il biadi era abstract – e tuttina vesan ins figuras concretas. Alessio realisescha visiuns psichedelas, cun pupi, tuscha e rispli. E cun color e guila silla pial da concarstgauns che vulan posseder ina ta-

la ovra d'art. «Enzatgei aschia havess jeu mai sminau. Las figuras che Alessio malegia san esser spirtuas, legras, stgiras tochen sneivlas. El drova negins models, mobein el malegia ord la fantasia. Alessio para da far sia fuorma expressiva cun ina precisiun, cun pazienza e perseveranza indescrivibla. Decorativ eis ei en scadin cass. Quei stueis mirar», ha la menadra dil museum intimaui tiel beinvegni e fatg gust da seconfruntar cuagl art dad Alessio Schmed.

Pablo cumpletescha ils treis fargliuns. Leu era medemamein il tierz biadi alla lavur. El mischeida buca colors, malegia era buc, fa buca musica. Cul num Lucid Core mischeida el musica da tecno. Igl ei ina direziun creativa, buca leva da capir, cunzun per la «clientella convenziunala» sco quella che viseta la Cuort Ligia Grischa. La sentupada da dumengia suentermiezdi ha avischinu alla variaziun digl art e dalla musica, da siemis e creativitat, rave e decoraziuns sil tgierp. Ils treis biadis da Gieri Schmed e lur tat permier ein s'anflai ella venerabla casa dils avats.

Pil mument negin premi «cardun d'argien»

Rodund 100 commembras e commembers dalla Cuminonza d'interess dils possessurs da secundas habitaziuns da Tujetsch ein separticipai la sonda vargada alla radunonza generala. Quella ha giu liug ella halla plurivalenta a Sedrun. Era uonn ha la cuminonza previu in tshuppel activitads. Il premi «cardun d'argien» duei denton ruassar il mument.

HANS HUONDER/FMR

Sper las tractandas statutarias plitost formalas, ha la cuminonza reeligiu sia supraponza. Al tgamun da quella resta l'anteriura cussegiera nazionala *Vreni Müller-Hemmi*. Igl onn 2025 contonscha ella la limita dil temps d'uffeci da diesch onns. Lu vegn la cuminonza a stuer remplazzar la presidenta. Il post da *Margrit Weber-Scherrer* ch'ei seretratga dalla supraponza resta vacants. La finamira dalla cuminonza ei d'occupar quel ton pli spert. Tenor ils statuts secumpona la supraponza da maximalmeinsiat commembras ni commembers, il mument eis ei sis. «Ils proxims onns lessen nus empur da regiuvinar la supraponza», di Vreni Müller-Hemmi.

La supraponza ha orientau detagliadamein la radunonza generala davart las activitads arranschadas igl onn vargau. Puntuau ha la presidenta en special la sentupada dalla cuminonza d'interess dalla possessuras ed ils possessurs da secundas habitaziuns da Tujetsch, Mustér ed Ursera. Talas sentupadas duein vegnir organisadas era igl avegnir. A quella digl onn vargau ha *Mike Goar* da Vail Resorts e niev CEO dalla Andermatt Sedrun Sport SA informau davart ils projects dalla pendicularas.



La supraponza dalla Cuminonza dalla possessuras e dils possessurs da secundas habitaziuns da Tujetsch. Da sen. Markus Müller, Christina Menzel, Werner Strebel, Vreni Müller-Hemmi, Roman Schmid e Christoph Marugg.

FOTO MAD

Negin «cardun d'argien»

La cuminonza ha acceptau in credit da maximalmeins 5000 francs per la renovaziun dalla piazza da giugs sut il Bogn Sedrun. «Quei ei ina summa simbolica, mo cun quella lein nus dar in accent en favur da nossa destinaziun cun purschida per famiglias», accentuescha la presidenta.

Pil concert da *Stephan Eicher* e Swiss Orchestra l'entschatta fenadur ad Andermatt ein 60 commembras e commembers – per part era dalla cuminonza da Mustér – s'annunziu. «Cun tals arranchaments sur il cuolm lein nus mussar tgei pusseivladads che Andermatt porch», di Vreni Müller-Hemmi.

Ils rodund 100 presents alla radunonza generala ein medemamein vegni informai davart la fiasta dil vitg igl uost a Rueras. A quella eis ei danovamein previu da separticipar cun in stan d'informaziun. Per la tiarza ga vegn il cuors da romontsch arranschus quest onn en Val Tujetsch. Tenor la presidenta ein rodund 30 persu-

nas s'annunziadas, era uonn per part da Mustér. Pil mument surdat la cuminonza negin «cardun d'argien», il premi da reconuschientscha per projects innovativs e specials ella Val Tujetsch. Quel ei vegniu surdaus entochen ussa duas ga. «Nus havein il mument ina grond'activitad ed il temps da sefatschentar era da quel premi maunca semplamein», di Vreni Müller-Hemmi.

Informaziun davart l'energia

Las possessuras ed ils possessurs da secundas habitaziuns ein vegni orientai la sonda da *Ciril Deplazes* dall'Energia alpina davart las pusseivladads da spargnar e producir energia. «Quei ei in tema actual ch'occupa nus tuts. Nus havein survegniu biaras bunas informaziuns tgei ch'ei prudent, respectivamein meins prudent. Igl ei impurtont da schar cussegljar e giudicar danovamein en mintga cass», di Vreni Müller-Hemmi. Con impurtonts ch'il tema seigi hagi la gronda discussiun suandonta allas explicaziuns da *Ciril Deplazes* mussau. Lez ha medemamein orientau davart il project da fotovoltaica che la vischnaunca persequitescha el territori Cuolm Val – Scharinas. Seprésentada per l'emprega ga alla cuminonza ei era la nova menadra da team da Sedrun Mustér Turissem, *Flavia Berther*.